

福建通志

第陸拾伍冊
列傳

K295.7
1

福建列傳卷二十一

明五

林瀚字亨大閩侯人成化丙戌進士改庶吉士授編修進修撰遷諭德弘治初修憲宗實錄充經筵講官三年王恕薦瀚學行醇正稍遷國子監祭酒與章懋講學爲懋所重時恕爲吏部尙書其子承裕入太學應對失辭瀚扶而教之恕詣瀚拜謝時論兩高焉典國學垂十年饌銀歲以百數計悉貯之官以次營立署舍師儒免僦居由瀚始進禮部右侍郎歷吏部左右侍郎十三年拜南京吏部尙書以災異陳十二事曰明黜陟去冗官清吏弊定莊田折鹽鈔處監生嚴軍政省供應收才望禁奸貪停不急寬民力又奏請重根本曰保固南京曰佑啓皇儲又奏兩京頻年因災困於百役山陝供應軍興雲南廣東西征發勦叛山東河南湖廣四川江西造王邸浙江福建採辦物料日增所在庫藏空匱不可不慮帝納之然不能盡行也十四年春疏言兩京五品以下官獨十年一考察太閭略旨下吏部

嚴請如瀚言遂定京官六年一察之例瀚論事侃直當事滋不悅而海內
彌慕其名與林俊章懋張敷華號留都四君子正德六年改南京參贊機
務命未至瀚引疾乞休因陳養正心崇正道務正學親正人四事優詔慰
留時災異迭見瀚及南京諸臣條時政十二事曰隆大孝以先天下言先
帝奄忽上賓陛下親承付託惟任大臣而不改先帝所信用立大政而不
易先帝所貽謀屏斥近習力體先帝之親賢遠佞不假貴戚力體先帝之
割私任公戒飭邊備常若先帝之不忘外禦撙節財費常若先帝之不忘
生靈事無內外惟倣先帝所已行者行之則大孝之實通於天下矣曰集
羣議以決政事言近來旨由中出內閣所擬上者竟行改易當其謀者悉
不預聞伏願延接大臣講求治理事無大小悉從擬議再召內閣預聞務
得政令大體以合天下之大公其他所陳皆剴切無忌諱士論韙之然權
奸自是側目矣瀚素剛方與守備中官不合他內臣進貢道其地者瀚每
裁抑之遂交譖於劉瑾大學士劉健謝遷之致仕也瀚聞歎息言官戴銑

等以奏留健遷被逮瀚獨贐送瑾銜甚明年二月矯詔謫瀚浙江左參政致仕旋指爲奸黨自健遷及瀚等凡五十三人榜姓名於朝堂瑾誅乃復官致仕命有司歲時存問卒年八十六贈太子太保諡文安瀚長不滿七尺而音如洪鐘美髯鬚家居雖年高泛應周旋禮意勤懇簡答題封皆手自治天下稱厚德者必推首焉子九人庭桂庭梈庭楷庭杓庭樟庭模庭枋庭枝庭機庭梈庭機最貴顯自有傳庭桂字利芳成化庚子舉人庭楷字利賢福州左衛指揮僉事庭杓字利高南京右府經歷擢慶遠知府慶遠雜民猺每新郡守至上官輒餽金爲賀庭杓婉辭卻之西南有清漳洞賊首李天返積爲害庭杓撫納之北有丁洞盜集衆張旗幟突至郡城外庭杓督兵追捕殺之餘黨悉平前官嘗徵銀爲使客費歲凡三四次民賣田鬻子多逃亡庭杓痛革之民始復業居九年乞養歸民構生祠祀之庭枋廣東經歷庭模弘治戊午舉人歷潮州府同知庭枋太學生上虞縣丞庭枝正德己卯舉人庭模子煜字貞華嘉靖壬午舉人官遼遠長史庭模

號秋江煜號少江世因稱兩江宦跡所至各有聲煜弟烺嘉靖癸卯舉人
官靖江長史煜子垠嘉靖辛卯舉人桂陽知州陞撫州府同知終戶部員
外郎有詩名 道光舊志

黃仲昭名潛以字行莆田人成化丙戌進士與羅倫章懋賀欽蔣景陸克
深謝文祥鄭克修同榜以名節相激厲改庶吉士授編修三年十二月帝
將以明年元夕張燈命詞臣撰詩詞進奉仲昭與懋景疏諫曰頃諭臣等
撰造峯煙火詩詞臣等竊議此陛下以兩宮聖母在上欲備極孝養以奉
歡心耳然大孝在乎養志不可徒飾耳目之玩以爲樂也今川東未靜邊
左多虞江西湖廣赤地數千里萬姓嗷嗷張目待哺此正陛下宵旰焦勞
兩宮母后同憂天下之日至翰林官以論思爲職鄙俚之言豈宜進於君
上伏讀宣宗皇帝御製翰林箴有曰啓沃之言惟義與仁堯舜之道鄉魯
以陳張燈豈堯舜之道詩詞非仁義之言若謂煙火細故不足爲聖德累
則舜何必不造漆器禹何必不嗜旨酒漢文何必不作露臺古帝王慎小

謹微必矜細行者正以欲不可縱漸不可長也伏乞將煙火停止帝以云
夕張燈祖宗故事惡仲昭等妄言並杖之闕下左遷其官仲昭謫湘潭知
縣京師稱爲三君子而修撰羅倫先以言事被黜時又有翰林四諫之稱
未行以給事中毛宏等言改仲昭南京大理評事寺之直堂守門隸卒率
皆取其直而逸其人上下相安以爲故常仲昭謂義不當得竟不取評事
納薪者例二人同官者援京例擬增一人以上請仲昭與懋曰吾二人在
罪謫方省愆之不服敢議是哉不署名他日得之亦不敢受也
時有臺官縱子弟不法論者曲庇之仲昭不許有富民兄弟相訟其家器
物多干法當投入官富民廣交游論者亦曲庇之且陰託善仲昭者以請
亦不許戶曹屬吏有爲監倉大僚構陷者仲昭曰罪下官以端大吏吾不
爲也亦不許又有數人同爲盜不得他財物惟得一婦人去相與計辱之
後竟弔之論者坐首惡一人大辟餘以未得財從未減仲昭謂人與財孰
重既得財家一婦人且辱之且弔之謂未得財可乎亦不許凡所不許者

皆反覆辯駁務盡其情所司亦多是仲昭卒歸於正由是平反者多而忌之者亦衆矣遂請歸省丁艱服闋赴京又引疾乞歸或勸之留曰吾親存尙不能俯首取祿爲養今復何求所以必赴此者乞一明白歸爾既歸築室下阜山中課耕植讀書爲文惟日不足暇則與田夫野老徜徉談笑酌酒間有以關節語者拒之廣東提學缺太學生簡進等乞起仲昭不報弘治改元御史姜洪以仲昭與章德舉景哲皆宿學當召用上許之至是仲昭家貧者十有七年矣三原王恕爲吏部奉詔起仲昭令所司以禮敦促庚戌至京參謁吏部報入恕及聞恕之以賓禮得議升堂初向所拜緒紳兩高之憂而恕使仲昭充祭修憲廟實錄官以須太廟嘗道者皆仲昭翰林時舊僚因宿忌竟沮之遂出爲江右憲以列題道前編及朱子綱目書法以君子立身莫先於禮於是定冠裳衣衾之制刊布以示後學乙卯連疏乞歸得請喜動顏色既抵家尋舊樂如故聞之八閩通志延平興化邵武南平縣志暨孝宗皇帝實錄事曰吾出其手平日精於校勘未嘗言勞其

精力亦盡於此仲昭雖累世仕宦率以清白相遺又其生產家無厚積官無厚祿布衣蔬食而二親甘旨恒具身若不勝衣至於辨論古今商確政務則又勇不可奪學者稱爲未軒先生卒年七十四兄深

林瀚撰墓志銘

深字仲淵父嘗以誣逮京師深朝夕奔走調護事竟白景泰辛未成進士拜御史奉命巡視京倉先是廷議擢節糧儲守倉衛卒月糧減十之四苦弗給深至會計當京倉已裕遂奏復之未幾卒深子乾亨

乾亨字汝亨成化甲午鄉試第一明年成進士奉旨安置降人於嶺南禮遺一無所取南人敬之父憂服闋念祖篤老乞南都便養有沮之者乃授行人十九年正月偕給事中林榮使滿剌加國故事使臣得招商買募習海事者以行有分堵常例銀度于兩乾亨卻不受或以爲正副使不宜異同乃留其半於官俾修靈妃祠發舟六日至洋嶼颶風作舟薄於石遂溺焉初乾亨奉使乞便道省母謂叔父仲昭曰茲行萬里不可無骨肉相依仲昭悲之遺子乾剛偕行方舟懷時乾剛且登石矣視乾亨急不忍去遂

同治乾亨年三十有二兩廣巡撫朱英奏聞命賜祭贈行人司副錄一子爲國子生仲昭曾孫懋官

懋官字君辯嘉靖戊戌進士授禮部主事改吏部歷文選郎中擢太僕卿三十六年奏言太僕職掌馬政今馬調兌日繁而寄養見在無幾動支日費而庫貯存積不多若不區畫撙節則將來之兌支未已防秋之豫備何措臣等私計竊有隱憂進順天府尹還南京戶部侍郎督糧儲三十八年二月條陳錢糧事宜言各衛官軍馬匹開支糧料如有逃亡倒失者宜計日扣還不得仍前案候以長奸弊軍匹日支口糧如遇小月卽除一日不得五年類扣以恣侵匿長安四門軍人口糧仍行原委司屬親詣給散不得妄委他司以致疏漏下部議從之三十九年二月南京振武營兵亂振武營者尙書張登募健兒以禦倭多無賴子舊制營卒月糧一石無妻者減十之四春秋二仲月每石折銀五錢及馬軍爲兩戶部尙書奏減折色之一諸軍始怨坤去蔡克廉代病不視事時歲大祲石米銀八錢諸軍求

復原額不得懋官又革募補者妻糧給餉又踰期值都肄日營卒遂圍懋官居第鼓譟懋官越垣投吏舍亂卒索得戕之裸其屍於市明日詣大臣集守備廳兵部侍郎李遂大言曰黃侍郎自越牆死諸軍特不當殘辱之吾據實奏朝廷不以叛相誣也因麾衆退許復妻糧及赦額人畀以一金補折銀始散而密諭營將掩捕首惡二十人事聞命褫懋官官止誅叛卒三人遂歎曰兵自此日驕矣既以戶部尙書江東爲參贊東多所寬假衆益驕無復法紀隆慶改元罷振武營

以上道光舊志

黃璉字汝器莆田人成化丙戌進士授南京戶科給事中故事進士偉儀觀音洪亮無南語則選給事璉獨以才望得之汪直擅柄王越相倚爲奸利璉極言之帝逐二人及其黨改禮科考滿遷浙江參議巡視溫處銀礦礦故竭率輸自民以糧爲差新礦開一出盜盤據之民重驚擾璉擒盜魁散其徒疏請塞礦罷課從之凡官爲是設者俱調別用璉乃改雲南其屬衛糧多備僚攬之輸不以時爲嚴設禁限焚驚者置之法自是逋負悉輸

納擢貴州參政其地夷獠雜居鎮以簡靜就遷右布政使轉左曹安賊婦米魯爲變朝命出師征勦璉總督糧儲處置有方賊平論功而璉已卒先在浙江時積勞當遷適巡按御史張文意不滿敘考有貶辭遂不果後璉爲貴州布政文以事謫爲照磨璉略不介意且薦其才於當路識者多之所居里田常苦旱璉白諸郡邑鑿渠由金墩抵巖沁數里引木蘭延壽餘水溉之遂成膏腴鄉人德之居官三十餘年卒之日家無餘貲子詢講見素集莆田縣志

陳岳字孟申別號翠庵主人莆田人祖道潛洪武庚辰進士歷給事中監察御史永樂間嘗與修性理大全諸書有聲父光亮岳少穎悟愛經於教授林存敬之門成化丙戌進士尋觀政大理丁亥冬拜戶部江西主事嘗奉部檄監視內帑時中貴人司出納頗不循理岳從容規正侃侃不少阿中貴人敬憚至岳去不敢妄有所訛法其在官恒念父老不得奉朝夕凡可以娛親介壽者必多方致之旣而奉命督儲江右因得便道歸省日集

賓客與父燕飲爲歡踰三閱月將還朝父忽遭疾不起岳哀毀踰制服既
闋將謁選北上而卒年四十五岳沈深有智略尤篤於孝友事季父猶父
處宗族有恩意居第自取弊陋以美者讓諸兄女弟適王氏早寡給田贍
之葺先祠修譜牒鄉黨故舊事有當爲者力爲區畫死喪患難之際尤致
意焉曩居京師時友人高貢士資悅卒買棺斂之權厝於逆旅以待其家
人其後興化衛指揮丁其客死京殯斂之如高四川憲副彭鳳儀嘗以言
被譴當是時雖親且故者不敢過其門岳往來慰問無虛日焉

未軒公文集

邱山字安重別號拙菴莆田人少有佳士之目募元儒盧希韓之爲人同
里林進士庭芳奇其才女焉踰冠遊邑庠天順己卯鄉薦成化丙戌成進
士觀政工部承命往甘肅散賞有功官軍總戎道以習喪異物俱不受明
年授温州府瑞安縣知縣縣號繁劇豪猾至不奉法苛虐生女多不舉由
歎曰民俗之弊一至此乎卽嚴令禁之而教以婚嫁之宜故刑部侍郎曾
輦巡視浙江首奏旌異辛卯浙江鄉試補內簾所舉士時稱得人壬辰滿

考擢江西道監察御史初巡通州倉再巡南城皆力去宿弊乙未京師飢
監糶太倉米奉勅清理兩廣軍政遠惠州郡無不身至辛丑巡按應天等
府推鞠冤獄活誣陷三百餘人擢雲南按察司副使以足疾懇疏乞休家
居五年卒年五十有九所著有賓陽樓集六十卷存於家山學有本末而
器量過人善書刻石崖州大忠祠一時重之曾孫秉文

秉文字鳴周嘉靖甲辰進士授永嘉知縣再補長興遷刑部主事楊繼盛
以劾嚴嵩下獄嵩密諭西曹諸郎苦繼盛秉文遷於監東獄得脫籠梏具
橐餽調藥餌李默爲吏部尙書以此奇秉文遷光祿丞給事中楊允繩劾
奏太常丞胡膏黷貨狀膏遂奏允繩謗帝齎難出草示秉文秉文折之曰
君疏辨誣足矣何用謾詞倘不測如國體何膏銜之無何默亦坐逮繫嵩
子世蕃遂指秉文爲默黨因以災異免秉文官秉文曰吾受知李太宰太
宰坐繫而尚靦然長安道罷後矣歸結社談詩語時事情憤憤也

彭惠安集
閩書

林正字克全莆田人成化丙戌進士授廣東監察御史勤敏有風力九年

巡視山東抵儀真河道直隸潯湮令兩岸植柳以固河堤往來舟楫便之
先是沿河郡縣皆設淺鋪鋪有夫夫出椿芻有定數以耆民典之率受賕
欺蔽而芻不登於官正至令民視芻價減半折納其弊遂革所轄郡縣有
支流通人行遇洪水泛溢多溺死者爲造橋梁十二所人免病涉十一年
巡按蘇松常鎮四郡松江府大姓坐奸誘人財重辟正鞫得其狀白之丹
陽知縣蔡其善交納權貴正按其不法事權貴交口爲救解正弗爲動卒
奪其官民德之明年復按廣東首詢民瘼豪黠吏聞風斂迹甫三閱月以
卒年僅四十一

關書萬姓統譜道光舊志

魏富字仲禮少孤學於陳真晟謝璉第成化丙戌進士授御史時諸司入
覲多過盜命富譏察之富戒行先裁同事官卒之不入約束者盜聞不敢
肆掠巡按廣東林蠻洞蠻爲亂廉得不法吏數人置於理蠻輩復隸編戶
遷浙江僉事進副使有健令爲豪猾所誣久坐繫獄同官知其情莫敢辨
富爲直之浙東蕭山諸暨隄岸爲水所啗富命築石隄捍田數千頃賑嘉

湖寧台饑存活六萬餘人仍積粟爲後滿弘治初進江西按察使吉安故
多訟富建議增置推官專理之每僚佐巡歷歸必問曰去吏墨幾何直民
冤幾何五年陞右僉都御史整飭荊州等處兵備巡撫順天諸府畿內地
多中貴及將領操利匿亡互相倚援富部分將領授以成算一時無犯者
尋以病告歸十一年起南京大理少卿進正卿議大事輒於衆中特出斷
論隱然繫留都輕重者垂十年正德改元遷戶部右侍郎遂致仕富歷仕
四十餘年隨事盡職未嘗立異譽輒隨之疏衣糲飯泊如也八年卒祭葬
如例

羅明字文昭成化丙戌進士授御史奉敕清浙江鹽法均徭戢橫權勢斂
迹巡按廣西適內批命鎮守少監黃泌取珍禽異獸明奏止之行部所至
汰貪獎直境內肅然還掌道事東直門災朝廷詔旨金爲眞武像遣中官
送武昌山崇祀復率同列上疏謂徒費財擾民無益糾災之政又言鑒興
遊幸南城西海賜資無度非敬天之實時有大臣以賄罷寅緣復進者有

近倖越例奏請得錄子入監者有方面以考察被汰妄訴屢抑得復職者俱奏請追寢前命時論韙之遷陝西按察副使奉敕撫治其中其地多遁逃數奏立白河縣以安輯之就遷按察使值歲旱饑人相食條上救荒十二事皆見施行進雲南左布政司踰年擢副都御史巡撫甘肅請罷貢獻以息橫劫復奏奪勢家擅草湖之利以還軍士增廣貢士額先是祀先聖率用俗樂明命有司講求禮制備古樂舞器服演習之邊方始覩文明之盛弘治二年璽書褒美其區畫哈密功以工部右侍郎召已卒旬月矣歷官二十餘年清介勤慎始終一致子雲麟字世瑞當蔭叙以讓弟雲鳳以貢士訓導湘鄉人稱其友

林沂莆田人父榮字從信天順丁丑進士授南京御史成化初疏言七事皆中時弊遷廣東按察司僉事改江西卒沂少有志聖賢之學登成化辛丑進士第授工部主事調禮部進士李文祥以言事忤執政萬安劉吉升直等謫西安府咸寧丞南京主事夏崇文論救不納沂復請召文祥時安

已去吉直激帝怒嚴旨切責之廣東布政使陳選爲市舶太監章壽誣劾
逮繫道卒弘治初沂上疏追理選冤詔復官禮葬之累官貴州參議
莊恭字儀甫晉江人爲諸生從莆田吳仲珠學而與黃仲昭友登成化己
丑進士第授刑部主事給事中韓文等以論兩宮事被拷訊恭首疏廷救
之陞員外郎出爲江西按察僉事風采颺發行部南安上猶令墨望風解
去入與試士拔豐城楊廉於落卷中成化丁未領寇大誣禍延閩楚粵三
省朝議知恭負文武才陞爲本司兵備副使踰月巨魁授首建昌賊州寇
復作間有長鬚善妖術者能騰空陷陳勢張甚恭用厭禳法出奇殲之前
後俘賊無算詔悉平定安輯捷聞璽書嘉勞賜金帛寶鈔凡三兩城張昇
廣昌何高新爲鄕邦計戚誦卽本土超擢爲藩僉使觀察使會丁祖母憂
歸卒恭孝友無間待人情禮備至善物色後進識衆文藝於童年期以大
儒見李文文祥指爲年家鐔鐔所交遊來往桂周翠蓮張東海張雍康僊
泰數人當憲廟時閣王直幻術李孜常最用事而省江右人也屢欲得